

- विधानसभा चुनाव प्रचार सारू महज़ तीन दिन बच्चा—स्टार प्रचारकां रा दौरा जारी।
- बत्ता ऊं बत्ता मतदान बाबत् जाग जगावण सारू मनाया जा रह्या सतरंगी सप्ताह रा तैत आज नौजवानां सारू जागरुकता कार्यक्रम राख्यी ज्या।
- आसियान रा महासचिव डा. काओ किन हॉर्न भारत सागे रिश्तां मांय न्यारा—न्यारा हलकां मांय अपार संभावनावां रो जिक कीनो।
- 54वों अंतराष्ट्रीय भारतीय फिल्म महोत्सव काल गोवा मांय सरू व्हेला— 270 फिल्मां बतायी जावेला।

000

राज्य मांय विधानसभा चुनाव रा प्रचार सारू अब महज़ तीन दिन बच्चा है अर न्यारी—न्यारी पार्टियां रा स्टार प्रचारक आप—आप री पार्टी रा उम्मीदवारां री हिमायत मांय प्रचार कर रह्या है। भारतीय जनता पार्टी रा आला नेता अर प्रधानमंत्री नरेंद्र मोदी आज पाली मांय विजय संकल्प सभा ने संबोधित कीनी। वे राज्य मांय कांग्रेस रा मौजूदा राज मांय भ्रष्टाचार, परिवारवाद अर तुष्टिकरण रो आरोप माण्ड्यो।

.....

श्री मोदी कह्यो के कांग्रेस रा राज मांय महिलावां अर दलित तबका री जनता ने निशाणो बणायो जा रह्यो है। वे कह्यो के कांग्रेस रा राज मांय राजस्थान महिलावां रे खिलाफ अत्याचार रा मामलां मांय देश भर मांय सब ऊं अगाडी है। प्रधानमंत्री हनुमानगढ जिला रा पीलीबंगा मांय ई विजय संकल्प सभा ने संबोधित कीनी। वे बीकानेर मांय रोड़ शो कीनो। भाजपा रा राष्ट्रीय अध्यक्ष जे पी नड्डा अर आला नेता अमित शाह ई आज ऊं प्रदेश मांय तीन दिन ताई प्रचार करेला। जे.पी. नड्डा उदयपुर मांय रोड़ शो कीनो। जयपुर रा आमेर मांय राख्यी ज्या जनसभा मांय उत्तर प्रदेश रा मुख्यमंत्री योगी आदित्यनाथ कह्यो के राजस्थान लारला पांच साल मांय अपराध, अराजकता, भ्रष्टाचार, महिला उत्पीडन अर साइबर अपराध रा मामलां मांय सब ऊं अगाडी है। भाजपा री ओर ऊं हेमंता विश्व सरमा, स्मृति ईरानी, पीयूष गोयल, गजेंद्र सिंह शेखावत अर वसुंधरा राजे समेत दूजा स्टार प्रचारक न्यारी—न्यारी ठौड़ां चुनाव प्रचार कर रह्या है। दूजी कानी कांग्रेस रा राष्ट्रीय अध्यक्ष मल्लिकार्जुन खड्गे श्रीगंगानगर मांय चुनावी सभा मांय कह्यो के राज्य री गहलोत सरकार हर हलका मांय विकास रा काम कीना है।

000

मुख्यमंत्री अशोक गहलोत आज भरतपुर मांय कांग्रेस री हिमायत वाळा आरएलडी रा उम्मीदवार डॉ. सुभाष गर्ग री हिमायत मांय चुनावी सभा ने संबोधित कीनी। वे कह्यो के राज्य सरकार काश्तकारां सारू न्यारो बजट पास कीनो जो और कोई सरकार नी कीनो। गहलोत राज्य मांय कांग्रेस रा राज मांय जनता रा भला सारू करी ज्या कामां रो जिक कीनो। वे टोंक, पाली अर जोधपुर मांय ई जनसभावां कीनी। पार्टी री नेता प्रियंका गांधी केकड़ी अर जहाजपुर मांय प्रचार कीनो।

केकड़ी मांय प्रियंका गांधी कह्यो के चुनाव रो बगत सरकार रा काम रो जायजो लेवण रो है। सचिन पायलट, सुखजिंदर सिंह रंधावा अर कन्हैया कुमार समेत कांग्रेस रा दूजा नेता ई न्यारी—न्यारी ठौड़ां जनसभावां ने सम्बोधित कीनी। राष्ट्रीय लोकतांत्रिक पार्टी रा मुखिया हनुमान बेनीवाल अर आजाद समाज पार्टी रा राष्ट्रीय अध्यक्ष चंद्रशेखर आजाद ई आज लगातार प्रचार मांय लाग्या रह्या।

000

अर अब बात राज्य मांय चुनावी हलचल री—  
विधानसभा चुनाव सारू चर्चित सीटां मांय नागौर जिला री खींवर सीट ई शामिल है। ई सीट माथे बहुकोणीय मुकाबलो निजर आ रह्यो है। ई खास सीट ऊं आरएलपी रा अध्यक्ष हनुमान बेनीवाल चुनाव लड़ रह्या है, वटे ई कांग्रेस रा तेजपाल मिर्धा अर भाजपा रा रेवन्त राम डांगा पहली दफा विधानसभा रो चुनाव लड़ रह्या है। निर्दलीय उम्मीदवार दुर्ग सिंह चौहान ई मुकाबला ने दिलचस्प बना रह्या है।

000

000

प्रदेश मांय 25 नवंबर ने व्हेवण वाळा विधानसभा चुनावमांय बत्ता ऊं बत्ता मतदातावां कानी ऊं वोट देवण बाबत् जाग जगावण सारू मनाया जा रह्या सतरंगी सप्ताह रा पांचवां दिन आज नौजवानां सारू खास कार्यक्रम राख्थी ज्या। सवाईमाधोपुर मांय नेहरू युवा केंद्र री ओर ऊं न्यारा-न्यारा ब्लॉक मांय पीळा रंग री थीम अर मताधिकार का प्रयोग करेगे वोट करेगे वोट करेगे नारा सागे नौजवान रैली निकाल र मतदान जरूर करण रो संदेश दीनो। शहरी हलकां मांय ई कम मतदान वाळा हलकां मांय नौजवान उदासीन शहरी मतदातावां ने रैली निकाल र मतदान जरूर करण रो संदेश दीनो। सादुलशहर अर श्रीगंगानगर मांय न्यारा-न्यारा शिक्षण संस्थानां रा विद्यार्थी जागरूकता रैली निकाली ज्यी। बाडमेर मांय ई सतरंगी सप्ताह रा तहत आज मतदाता रैली रे ज़रिए नौजवान "मताधिकार का इस्तेमाल करेगे, वोट करेगे-वोट करेगे रो संदेश दीनो। इण ऊं पैली जागरूकता रैली मांय सिरकत करण वाळां ने वोट जरूर देवण री सौगंध दिरायी ज्यी। देवली रा कॉलेज मांय ई जागरूकता कार्यक्रम राख्थी ज्यो।

000

राज्य मांय विधानसभा चुणाव ने ध्यान मांय राखता थकां लोकतंत्र रो उत्सव मनावण अर वोट देवण सारू जाग जगावण रा मकसद ऊं आकाशवाणी समाचार जयपुर री ओर ऊं संदेश श्रृंखला चलायी जा रही है। इण मांय आप व्हॉट्सअप नम्बर 9414052368 माथे संदेश माण्ड र या आप री आवाज मांय रिकॉर्ड कर र वोट देवण सारू प्रोत्साहित करण रो संदेश भेज सको हो। चुणी ज्या संदेश आकाशवाणी जयपुर ऊं प्रसारित कर्या जावण वाळा समाचार बुलेटिनां मांय चलाया जावेला। आज पेश है .बालोतरा जिला रा गणेश चौधरी रो संदेश

000

एसोसिएशन ऑफ साउथ-ईस्ट एशियन नेशनस- आसियान रा सेक्रेटरी जनरल डॉ काओ किम हॉर्न कह्यो है के आसियान अर भारत रा रिश्ता 30 साल ऊं लगातार आगे बध रह्या है अर आवता बगत मांय सामुद्रिक, डिजिटल माली व्यवस्था अर ब्ददमबजपअपजल सरीखा हलकां मांय आपसी रिश्तां रा विकास री अपार संभावना है। डॉ. हॉर्न आसियान इंडिया मीडिया एक्सचेंज प्रोग्राम रा तैत इंडोनेशिया रो दौरा कर रह्या भारत रा मीडिया प्रतिनिधिमंडल सागे मुलाकात रे दौरान कह्यो के इस्राइल-हमास बीचे लड़ाई सरीखा मुद्दां रो एक मात्र हल शांति सागे बातचीत है।

000

भारत रा मीडिया प्रतिनिधिमंडल री अगुवाई आकाशवाणी जयपुर रा समाचार निदेशक नीलेश कालभोर कीनो।

000

54वों अंतराष्ट्रीय भारतीय फिल्म महोत्सव काल गोवा मांय सरू व्हेला। इण मांय ब्रिटिश फिल्म कैचिंग डस्ट पहली अर अमरीका री फिल्म फेदरवेट आखिरी फिल्म व्हेला। सत्यजीत रे लाइफटाइम अचीवमेंट अवार्ड हॉलीवुड अभिनेता अर निर्माता माइकल डगलस ने दियो जावेला। नौ दिन ताई चालण वाळा ई महोत्सव मांय चार ठौड़ां 270 फिल्मां रो दर्शाव कर्यो जावेला। अंतराष्ट्रीय भारतीय फिल्म महोत्सव मांय ई साल ओटीटी पुरस्कार ई सरू करी ज्या है। फिल्मां बणावण ऊं जुड्या फिल्म बाजार रो आयोजन महोत्सव रे दौरान ही 20 ऊं 24 नवम्बर ताई व्हेला।

000